



Här Fernand Etgen
President vun der Chamber
Lëtzebuerg, den 30. September 2022

Här President,

Esou ewéi den Artikel 80 vum Chambersreglement et virgesäit, bieden ech Iech, dës parlamentaresch Fro zu der interener Kommunikatioun beim *CGDIS* un d'Madamm Inneministesch weider ze leeden.

Laut mengen Informatiounen kréien d'Agente vum *CGDIS*, déi an de Grenzregiounen op Asätz fueren, direkt hannert Grenz kee Zougang op dat internt Funknetz méi. Dat bréngt mat sech, dass si net méi kënne mam 112 kommunizéieren, et sief dann mat hirem Privathandy. Am Fall vun engem Ausfall vum Handyréseau wäer deemno guer keng Kommunikatioun méi méiglech, wat bei enger Urgence kann fatal sinn. En plus géingen an deene Situatiounen och d'Navigatiounssystemer vum *CGDIS* net funktionéieren, wat e weidere Problem duerstellt. D'Agente géingen also riskéiere bei Asätz op sech elenggestallt ze sinn, wat net am Interêt vum *CGDIS* a vun der allgemenger Sécherheet ka sinn.

An dësem Kontext géif ech gäre folgend Froen un d'Madamm Ministesch stellen:

- Kann d'Madamm Ministesch dës Informatiounen confirméieren?
- Wa jo, wéi sinn dës Problemer z'erklären?
- Wa jo, wéi gedenkt d'Madamm Ministesch dës Problemer an Zukunft an de Grëff ze kréien?

Här President, ech bieden Iech mäin déifste Respekt unzehuelen.

Léon Gloden
Deputéierten